

# 'Speedy Jantan' tersasar dari podium

Aida Adilah Mat

aida\_adilah@nstp.com.my

**Kuala Lumpur:** Kejutan berlaku dalam acara 100 meter (m) di Kejohanan Olahraga Terbuka Malaysia apabila jaguh pecut Asia Tenggara, Khairul Hafiz Jantan (*gambar*) gagal menamatkan cabaran di kedudukan podium.

Ketika harapan untuk menyaksikan pelari yang dikenali sebagai 'Speedy Jantan' itu melakarkan satu lagi kejayaan di Stadium Nasional Bukit Jalil, pelari berusia 20 tahun itu menamatkan saingan di tempat kelima dengan catatan 10.64 saat (s), jauh dari rekod kebangsaan yang dicatatnya pada 2016 di Sukan Malaysia (SUKMA) Sarawak, 2016, 10.18s.



Emas dalam acara itu dimenangi pelari Sri Lanka, Vinoy Suranjaya De Silva 10.27s yang turut diiktiraf sebagai rekod baru kejohanan.

Perak milik Jonathan Nye-pa, 10.40s manakala juara bertahan, Haiqal Hanafi

mencatat 10.58s untuk gangsa.

Bagaimanapun, menurut Khairul Hafiz, acara 100m yang berlangsung itu sepatutnya tidak diiktiraf apabila Vinoy yang berlari di lorong kelima dilihat terlebih dulu keluar daripada blok pelepasan.

"Saya tak puas hati dan geram. Acara akhir itu sepatutnya 'false start'. Pelari di lorong kelima keluar dulu dan saya ingat pengadil akan batalkan tapi ia diteruskan juga.

"Nak buat macam mana, terpaksa terima. Ini satu pengalaman baru buat saya," katanya mengakui keadaan cuaca dengan keadaan trek basah dan acara akhir ditangguhkan selama lebih sejam sedikit mengganggu tumpuan.

Khairul bagaimanapun berpeluang menebus kecewaan apabila turun beraksi dalam acara 200m hari ini. Dia turut dijangka beraksi dalam acara 4x100m yang dijadualkan berlangsung esok.

Sementara itu, dalam pe-cut wanita, Zaidatul Husniah berjaya mengekalkan rentak konsisten apabila meraih emas.

Selepas cemerlang di temasya Komanwel apabila mara ke saingan separuh akhir, Zaidatul Husniah yang dikenali sebagai Adik itu merekodkan 11.65s untuk pingat emas.

Dia menewaskan pelari Sri Lanka, R M Ruñeshkika Rathnayake di tempat kedua, 11.76s dan pingat gangsa milik S Komalam Shally, 11.91s.

